



South Korea taoba first
lady tepuokdaki yokogo

West Ham-i Fulham nungi
winger Traore alizükogo



ANATG-2015 Batch longkak aittsü renemer

Dimapur, Aenjeti/January 28 (TYO): ANATG-2015 Batch (1994 aser 2012 tsüngta shimer) indang Core Committee ajungben senden ka January 27, 2026 nü CANSSEA hall, Kohima nung mena service regularization atema takhangba agüja aliba indang jembia liasü, koba Commissioner & Secretary, SE & SCERT, Government of Nagaland nem January 7, 2026 nü agütsü aser January 30, 2026 nü mapang liwatsü lir.

Iba senden nung district 17 nungi units 14 prongla dena parnoki akhangba ama mapang latetja aliba nung service

regularization mesütsüra, ANATG-2015 Batch ajanga tekeraba nung züngsemtem Kohima nung ayongtepa democratic yimya nung tejashi sayutsü aser iba ya parnok telok tatemba tenokdakba asütsü Core Committee-i telemtetba agi. Committee-i par züngsem ajunga dang iba longkak aitiba nung shilem agütsü totuyuba agütsü aser tashi mangar nem temerenshi agütsütsü lemtet.

Parnoki akhangba ama Sorkari meinyakra, longkak aittsü asoshi unit balala tashi itshitsü iba senden nung telemtetba agia liasü.

ICH single-window portal senden nung state nungi ketdangsürtem aden

Dimapur, Aenjeti/January 28 (TYO): Akashvani Bhawan, Sansad Marg, New Delhi nung January 28, 2026 nü India Cine Hub (ICH) single-window portal for filming senden aliba nung State nungi Deputy Director, DIPR Siewatho Nyusou-i anir Directorate of Information & Public Relations, Nagaland nungi ketdangsürtem dena liasü.

Secretary, Ministry of Information & Broadcasting, Sanjay Jaju-i iba senden tenzüka jembidang states ajunga ICH portal nung lungjemdaksütsü nüngdakba aser nükjidong rateta ashi.

Pai states aser union territories dang portal-i production houses

tulu tem bener arutsü ayongzüük aser ibaji ajanga tarutsü nung rongsenkettzüng tsütsü tajangzüük alitsü ta ashi.

Iba sapang asoshi ozüng yanglutsü aser online permission aser payments tajungba kuma inyaksü ta ashi aser states aser union territories ajunga dang ICH single-window portal lungjemdakja tawa aliba nung apu alatsü mepishia liasü.

Iba senden ya Ministry of Information & Broadcasting ajanga portal inyakyim tali tejangjaba nung angatetdaksütsü aser tapet Ministries, Departments aser State sorkar tem tsüngta tali amalitep lidaksütsü asoshi ayongzüka liasü.

Lanurtem atema state sorkari asalentong yanglua inyaker: TR Zeliang



Dimapur nung Nagaland - Japan Connect 2026 sentong nung tangokba noksa angur.

Dimapur, Aenjeti/January 28 (TYO): Alima nung luyim balala tsütsü lanurtem nem tashi agütsütsü atema state sorkari asalentong yanglur aser linüktem den amalitepa inyaker, ta Bodhbarnü Nagaland Deputy Chief Minister, T.R. Zeliang-i metetdaksü.

Integrated Business Hub & Innovation Centre (IBHIC), Dimapur nung Nagaland - Japan Connect 2026 nung jembidang TR Zeliang-i, iba ya sentong ka dang masü saka tarutsü nükla yur Nagaland aser Japan na tsüngda taliba amalitepa inyakba sabang ka lir, ta ashi.

Paisa, Kochi Prefecture den MoU tezüngzüktep agiba ya sorkar o sorkar tsüngda tongtubang alizüng ka tongtetba lir, talisa human resource exchange, skill development aser aluyimba tsütsü amalitepa inyaksü nükjidong nung iba tezüngzüktep agir, ta metetdaksü.

Deputy Chief Minister-i, Nagaland nung mapa shia alirtem lir aser tangar dak memetaloki rongsenkettzüng ajungkettsüsa sector balala nung inyaksü atema Japanese partnership jaoker, ta ashi.

Southeast Asia kikümbang ka ama Nagaland ya tongtubang tesem ka nung lir, anungji tetangshi Japan nunger aser meranga inyakba Naga nunger na amalitep ajanga tasen purapiteta yangluba tiyongtsü tesem ka akümtsü koka lir, ta paisa shisem.

Kochi Prefectural, department of Commerce & Labour, Japan, Deputy Director General Kunitoshi Hojo-i, "Kanga tantsürtambur nütsüng aika akümba ajanga Japan nung sector aika nung nübo agi kanga anünger. Kochi yangertsü atema alima tesem balala nungi mapa inyakertem ayongdentsü asoshi onoki programme ka tenzükögo," ta metetdaksü.

Paisa, Nagaland nungi mapa ashir lanurtem aika arua parnok sempet lemsatsü aser Kochi Prefecture nung parnok luyim yangertsü onoki imlar, ta ashi.

Pai ashiba agi, tang Nagaland nungi lanur 19 Kochi Prefecture nung inyakdar aser taküm küm ano kar Kochi Prefecture-i aotsü.

"Iba mapatong ajanga maongka tasen aika angutsü aser ibaji ajanga Naga nunger lanutem aikati iba maongka agitetba den külemi Nagaland-a renloktsü," ta pai ashi.

Iba sentong nung Department of Linguistics, Nagaland University, HoD, Dr. Pangersenla Walling-i Centre of excellence for Foreign languages indang metetdakja liasü.

Sentong tetenzüklen Advisor to Chief Minister & Chairman, IDAN, Nagaland Abu Metha-i lokti pelaa agizükba o jembi aser Advisor, Industries & Commerce, Nagaland Hekani Jakhlu-ia o tatsüka jembia liasü.

Nagaland indang PARAKH Rashtriya Sarvekshan report sayaogo

Dimapur, Aenjeti (TYO): State Council of Educational Research & Training, Nagaland-i state indang PARAKH Rashtriya Sarvekshan (PRS) Report 2024 sayaba metetdaksüogo; iba report nung Grades 3, 6 aser 9 nung kaketshirtem tangazükba aser school shisaliok osang tejangja metetdakja lir.

Iba survey ya Ministry of Education kübok PARAKH NCERT-i 2024 küm December 4 nü agia state nung school 724 nungi kaketshir 22,220 aser tesayur 3,335 ayimjema Language, Mathematics, Science aser Social Science tsütsü asadanga liasü. Gender, Location,

School Management Type aser Social Group categories lemsar iba ya asadang.

Foundational Stage (Grade 3) nung kaketshirtemi National score den ishiba angu, talisa Mathematics nung majung liasü. Phek aser Mokokchung district na tajungba liasü aser tamajungba anaji Kiphire aser Tuensang na liasü.

Preparatory Stage (Grade 6) nunga kaketshirtemi National score den ishiba angu, talisa Mathematics nung majung liasü. Iba stage nung linük nung state tamajungtiba 10 rongnung Nagaland densema lir. State nung tajungtiba anaji

Mokokchung aser Phek na liasü aser tsünglanglen Noklak, Mon, Shamator, Tuensang aser Kiphire liasü.

Middle Stage (Grade 9) kaketshirtemi language nungbo national average dang nungi jenjang tajungba angu saka Mathematics, Science aser Social Science nung mejungi liasü. Kohima, Mokokchung aser Dimapur district temi jenjang junga angu aser tsünglanglen Shamator, Kiphire, Noklak aser Mon liasü.

National level nung state nungi district kati danga 'top performing districts' jenjang mangu.

Nagaland CM Dr. Rio-i Ajit Pawar mang ayimer

Dimapur, Aenjeti/January 28 (TYO): Maharashtra indang Deputy Chief Minister Ajit Pawar tanü Baramati, Maharashtra anasa tayimtsü lendong nung asüba angazüka kanga aoksar aser jashir. Iba meimlai aliba lendong ya ajanga Maharashtra aser linük ajunga mangyim tiai yoker aser India yimden tsütsü nembangtsü makokba tazüng adokdaksür, ta Nagaland Chief Minister Dr. Neiphiu Rio-i Bodhbarnü sangdong ka nung ashi.

Pawar ya official mapa asoshi Baramati-i aoba mapang pa mena aliba tayimtsü anendang ali nung tsükok aser yangji mena alir ajunga

takum sama.

Iba lendong ajanga bendanga agütsür nübur tenzüker ka takum anojungi bener ogo aser par kibong, külem tenzüker aser pai mapang talangka nübur tenzüka sakloker zünger meizingmai alibarisungtem mulungjang nung mangyim jashi bener arutsü, ta ashi.

Ajit Pawar ya takotet lenir ka liasü, shibai junga yimsü asüba, terenlok mapa aser nübur ajungtsü asoshi inyakba nung bendanga agütsüba ajanga yimten yimsüsür aser lokti balalai pa akumtsüboa liasü. Pai Maharashtra state asoshi aser linük asoshi küm aika inyaka aruba ya kanga akumtsüboa aser

temulung süa bilemtettsü.

Nagaland sorkar aser nüburtem tenüng nung mangyimer kibong, Maharashtra sorkar aser nübur aser pa anojungi asüba asoshi mangyimer ajunga den asükhu lemsateper, ta Dr. Rio-i ashi.

Par kinunger asoshi sarasademtsür aser Maharashtra nüburtem den onok dena lir.

Asür tanüla teti tatem maka tesunep nung anisüngzükjangma aser kinunger, tembar aser nüburtem nem Tsüngremi tashi aser tasü tait mulungsestsü agüjangma, ta Nagaland CM-isa ashi.

AO KIN

Tsüngrem Dang Temenen Nangzükbä

Sarasadem Sentong

January 30 & 31, 2026

Sentong 1

January 30, 2026 / 05:00 PM / MTBA Tenla Ki

Kenten anitsü	: MTBA Choir ketdangsürtem. I/c. Mr.Panger, Asstt.Pastor
1. Menden	: Rev. Dr. Bendang Longkümer, Pastor
2. Sarasadem ayongba nükjidong	: Rev. Ponen Longchar, Pastor
3. Tayongzükbä O	: a. Rev. Temsü Jamir, Executive Secretary, ABAM b. Mr. Marsanen Imsong, Tir, Ao Senden
4. Temeja ken	: MCBA Choir
5. Tsüngrem O	: Rev. Kari Longchar

Sentong 2

January 31, 2026 / 06:00 AM – 12:00 Noon

Lumia Sarasademba Mapang
Tesem: Imkongmeren Sports Complex

TEMETETTSÜ:

- Iba sentong nung asen Aor Aotsür ajak arua atentsü mepishir.
- Iba sentong asoshi ajaki sarasadema atadi.
Sentong ayonger : Mokokchung Town Ao Baptist Churches Mission

NPS Officers Mid Career Training tenzükogo



Principal Secretary to the Government of Nagaland, Abhijit Sinha aser ATI ketdangsürtem Nagaland Police Service atema Mid Career Training tenzükba sentong nung shilem agirtem den külemi tangokba noksa ka yangi angur.

Dimapur, Aenjeti/January 28 (TYO): Nagaland Police Services ketdangsür atema Mid Career Training sentong ka January 28, 2026 nü Administrative Training Institute (ATI) Kohima nung tenzükogo, kong Abhijit Sinha, IAS, Principal Secretary to the Government of Nagaland sentong akhumdong ka ama aden.

January 28 nungi February 4, 2026 tashi agitsü aliba training ya Establishment Matters nung rangloker ayongzük. Iba capacity building programme ya sorkar ketdangsür nem nungdakba shisatsü aser skills agüja inyakyim tajungba kumdaktsütsü nükjiding nung lir.

Iba training nung onük 16 shi awajemtsü aser shisalen sayur ya Department balala nungi lir.

Iba training ya Department of Personnel & Training Central Sector Scheme, Training For All (TFA)-State Category Training Programme (SCTP) component kübok senotsü teyari agüja

ayongzük.

V. Shashank Shekhar, IAS, Director General, ATI ajanga iba training ayongzükba nükjiding lemsatep aser ATI nung NPS Officers asoshi mezüngbuba Mid Career Level Training nung ketdangsürtem pelashishia agizüka liasü.

Taoba mapanga Nagaland Police-i mapa inyakba nung yimya shidak amshiba aser tasü tait mulungsentsü sayua liasü aser state nungi tanishirtem danga state nung oa inyakdanga parnok inyakyim asoshi tenüngsang agüja liasü, ta pai ashi.

Field level nung ketdangsürtem ya sorkar indang tejak amai lir, ta pai ashi aser temesepba mozü amshiba nungi lanirtem kumzükba ayutsü asoshi maneni teka amteper inyaktsü ayongzükba liasü.

Sentong akhumdong Abhijit Sinha, IAS ajanga jembidang, inyakyim kar atema skills aser training agütsüba den establishment matters shisatsü

aser manpower aser resources management atema training ya kanga tongtipang kumogo ta ashi.

Asenoki tanen makai angazüktsüla. Inyakyim shidak indang shisatsü ajanga ketdangsür temi telemtetba shidak agiba nung yaritsü.

Taoba mapang inyaker aliba mapa lepa repringtsü aser mangdang tasen asoshi shisatsü tali bendentsü atema iba amala training ya maongka lir, ta ashi.

Iba sentong nung Kaholi Sema, Joint Director (Trg) ATI menden liasü, Asalie Lese, Deputy Secretary P&AR aser training indang Course Coordinator ajanga iba training sentong tongmelang agi lemsatepa liasü.

Iba sentong nung Sanmeet Kaur, IPS, IGP PHQ; Akunu S Meyase IAS, Director ATI; Bendanglila, Addl. Director, ATI den ATI nungi ketdangsür aser staff tem dena liasü. Sentong tembanga Peter Konyak, Lecturer, ATL ajanga melepzüng o jembli.

EDTC ajanga petrol pump kiburtem dang metetdaksür

Dimapur, Aenjeti/January 28 (TYO): East Dimapur Town Council indang office nung January 19, 2026 nü senden mena pangzüng renema aliba ama EDTC kübok petrol pump kibur/operators ajungai müremkmeju aser public amenities shidak anepalutsüla, ta EDTC sangdong ka ajanga ashi.

Petrol pumps ajunga nung matamabensar nem metzü

meshiba tesem balaka ketja metzü meshiba tesem müreka ayutsüla, air inflation facility tajung alitsüla.

Ozüng nung aliba ama fire safety measures aser hadir shidak ayutsüla, nüburtem ajemtsü asoshi tzü tajung yutsütsüla, ta sangdong ajanga ashi.

Petrol aser diesel quality tajung amshitsüla aser

customer nem service shidak aser tajung agütsütsüla.

Nüburtem timtem majurutsü, kumzükba alitsü aser service tajung agütsütsü atema item facilities ya tongtipang lir.

Petrol pump kibur/operators ajungai iba mera ya February 2026 matemdang agütsütettsüla. Aibelener nem tapet temerenshi agütsütsü, ta EDTC sangdong ajangasa ashi.



Ao kin Tsüngrem dang temenen nangzükba sarasadem sentong koba Mokokchung town nung January 30 & 31 nü ayongzükba lir, iba asoshi mazüngi renemshiba mapang tangokba noksa nung angur. Tanü Imkongmeren Sports Complex nung iba sarasadem süki yangludang Mokokchung Town Ao Baptist Churches Mission (MTABCM) kübok arogo 10 den ano ABAM nungia Executive Secretary, Rev. Temsu Jamiri anir par külem tenzükertema densema nübutokba mapa nung shilem agia liasü. Iba süki ya lenten-metong 200x280 ft. lir aser yangji nisung meyi trok shi aitsü. Iba den ano LCD screen ana amshitsü aser gallery nunga nisung aika mendentettsüsa renemdar. Iba sentong ya denomination kecha mali, takarsaker, tulur-tilar, tanur-tain, temapur-telungpur, tetsur-tebur yamaji kecha mebandangi Aor-a ta asür tashibo ajak arua iba temoatsü agitsü asoshi MTABCM ketdangsürtemi ayongzükba metetdaksü. Mokokchung, 28th January, 2026

Atoizu nung Specialised Capacity Building sentong ayongzük

Dimapur, Aenjeti/January 28 (TYO): MSME ecosystem tashi itshitsü sorkari inyakba den lirumedema "Equip MSMEs to Manage Business Efficiently," "Entrepreneurship & Business Management," aser "Digital Marketing Trends and Social Media Marketing for MSMEs" onük nung ajemdaker Capacity Building sentong ka Department of Industries & Commerce ajanga Raising and Accelerating MSME Performance (RAMP) Scheme kübok World Bank teyari nung January 28, 2026 nü Jubilee Hall, Atoizu Town aser KPA Indoor Stadium, Asukhuto Town, Zunheboto nung ayongzükba liasü.

Shoremong Yim, entrepreneurship trainer ajanga

training session ketdang süa agi aser strategic business management aser digital marketing approaches rateta ashi.

Extra Assistant Commissioner, Atoizu, Dr. Samuel Akho Konyak P, NCS ajanga MSMEs tem tsünga entrepreneurial yimya adokdaksütsü aser digital competence alitsü nungdakba shia liasü.

District Project Associate, District Industries Centre, Zunheboto, Khekevi Awomi-i RAMP kübok scheme balala nung ajemdaker maongka aliba indang lemsatep.

Iba sentong nung dobashis, Atoizu Town Council züngsem, entrepreneurs aser lanurtem shilem agia liasü.

Gorkha Public Panchayat Kohima pur R-Day amung



Dimapur, Aenjeti/January 28 (TYO): Gorkha Public Panchayat Kohima (GPPK) pur January 26, 2026 nü GPPK Complex, Chandmari, Kohima nung 77 buba Republic Day mungogo.

Iba sentong nung taoba GPPK tongti zülur aser taoba Assistant Controller of Examinations, Nagaland Board of School Education (NBSC), Bharat Kumar Thapa sentong akhumdong ka ama dena liasü.

Iba sentong nung Thapa-i Republic Day amungba indang rateta ashi aser nüburtem dang constitution nung aliba ama telungjem, ajak sako aser lokti

khuret angateta alitsü ayongzükba liasü.

Republic Day amungba nung shilem ka ama GPPK-isa State Mental Health Institute, Aradhura, Kohima semdanga yangji alir aser ketdangsür nem jang o tzü lema agüja liasü.

Iba mapang State Mental Health Institute nung doctors, nurses aser staff temi bendanga agütsür inyakba asoshi GPPK-i pelaba lemsatepa liasü.

Iba anogo GPPK tir Santu Thapa-i nüburtem den Republic Day salem lemsatep aser maneni Gurkha nübur, state aser linük nung aliba nüburtem asoshi inyaktsü sangdonga liasü.

Drone Centre of Excellence nung FPV drone training tenzükogo



Dimapur, Aenjeti/January 28 (TYO): Nagaland Skill & Entrepreneurship Development Mission (NSEDMD) kübok Nagaland GIS & Remote Sensing Centre (NGISRSC)-i Drone School - Drone Centre of Excellence ajanga anogo 14 FPV (First Person View) Drone Training Programme January 27, 2026 nü tenzükogo.

High-precision piloting skills agütsütsü aser real-world drone applications atema tongtipang yimyatam sayutsü nükjiding nung iba training ya agütsür.

Teshimet candidate ter iba training nung shilem agitar, kong FPV drone assembly, simulator-based flight training, live operations, aerial manoeuvring, safety protocols aser basic troubleshooting sayutsü.

Iba training takok ngua agiba

sülen candidates nem Certificate of Completion agüja parnok entry-level drone operation aser services nung parnok takotet akumba kulizüngtsü.

NGISRSCS atema Industry Partner Droneverse Aviation Pvt. Ltd. ajanga placement teyari den drone-based service sectors nung practical exposure agütsütsü.

Lanurtem nem tashi agütsütsü, technology amshia poksünga alitsü aser state nung drone ecosystem tajung yangertsü asoshi state tasa nung ibai tongtipang mera ka alitsü.

FPV training yagi DGCA-certified Remote Pilot Courses aser danga non-DGCA modules in drone maintenance and sector-specific drone operations nung yarisemtsü.

Maharashtra Deputy CMAjit Pawar tayimtsü lendong nung asü



January 28, 2026 nü Pune district kübok Baramati anasa tayimtsü tsükokba tesem noksa nung angur. Iba lendong nung Maharashtra Deputy Chief Minister Ajit Pawar (telung noksa) densema nisung pongu asü.

Mumbai, Aenjeti/January 28 (Agencies): Bodhbarnep Pune district kübok Baramati anasa tayimtsü ka tsükokba lendong nung Maharashtra Deputy Chief Minister aser Nationalist Congress Party (NCP) lenir, arrshi küm 66 Ajit Pawar den tangar pezü süogo.

Directorate General of Civil Aviation (DGCA)-i ashiba agi, Ajit Pawar den pa body guard Vidhip Jadhav aser flight attendant Pinky Mali na, pilot Captain Sumit Kapoor aser co-pilot, Captain Shambhavi Pathak nunger liasü.

Iba lendong nung par ponguprongla asü, ta DGCA-i metetdaksü.

VSR Aviation director V K Singh-i, "Pilot-i tayimtsü anendak tesemji junga mangu asütsüa akok, iba sülen pai tanaben anentsü merandang asütsüa akok," ta metetdaksü.

Aircraft Accident Investigation Bureau (AAIB)-i iba tatalokba ya bushisüngdangtsü aser Pune rural police-i yariteptsü.

NCP-i, "Zilla Parishad election atema nüboyimtsü asoshi Pune-i aotsü atema Pawar tayimtsü nungji apusoa liasü. Pai iba district nung sentong pezü nung shilem agitsü liasü. Tayimtsü tsükokba mapang nungji Pawar'er kibong züngsemtem- Sharad Pawar, Supriya Sule aser Sunetra Pawar nungerbo Parliament nung budget senden nung adentsü atema Delhi-i oa liasü. Iba osang angashiba sülen parnok Baramati-i apuso," ta metetdaksü.

Tayimtsü tsükokba kuli

bushisüngdang tenzüksü atema AAIB nungi ketdangsertem Delhi nung aliba flight operator office tonga ogo.

Maharashtra Forensic Science Laboratory nungi team kata tayimtsü tsükokba tesem jagi oa 'samples' bendenogo, ta ketdangsertemi metetdaksü.

Flight-tracking data ajanga bushitetba agi, tayimtsü metsükok tsüngda tayimtsüji anünglen minute 35 shi yimsüa liasü. VSR Aviation indang tayimtsü ya Bodhbarnep 8:10 ako meta Mumbai nung aliba Chhatrapati Shivaji International Airport nungi apuso liasü aser 8:45 ako nungbo 'radar' nungi sama.

Maharashtra state sorkari anogo asemnü tashi Pawar atema mangyimtsü sangdongogo. State tesem ajaklen January 28 nungi January 30 tashi linük wako tom nung dang ayutsü aser official sentong kecha magitsü. January 28 nü state sorkar office ajak shibangtsü tuyua liasü.

Iba osang angashia Ato kilonser Narendra Modi-i, Pawar ya nüburtem atema lenir ka liasü, pa dak yimsüsüba sempet liasü aser sensakertem nem tashi agütsütsü atema kanga nendaka inyakba lenir ka liasü, ta metetdaksü.

Chief Minister Devendra Fadnavis-i, "Ni kanga aoksar aser mamangteter. Ni medemer tajung ka samaogo. Kobi melii ni Baramati-i apusoa aotsü aser Pawar'er kibong züngsemtem den jembitepa sentong renemtsü," ta metetdaksü.

Pawar'er kinünger aser Lok

Sabha MP, Supriya Sule-i social media ajanga kanga tongmelang agi, "Kanga jashir" ta metetdaksü.

Ajit Pawar ya 1959 küm aso. Pa ya Sharad Pawar tedi, Anantrao'er jabaso lir. 1991 küm mezüing pai yimtenren nung ajemoka election nung takok ngua Baramati nungi MP aküm.

2019 küm November ita nung pai BJP teloktep nung dena liasü. Pa tanaben NCP dangi meyip aser December ita nung Maha Vikas Aghadi sorkar nung Deputy Chief Minister aküm.

Ano 2023 küm July ita nung Pawar-i NCP nung telemsa adokdaksüba sülen MLA aikati pa yarisema BJP-i aniba Mahayuti sorkar nung aden aser Deputy Chief Minister aküm.

West Bengal Chief Minister Mamata Banerjee-ibo, iba tatalokba ya Supreme Court-i ketdangsüa bushisüngdangtsüla, kechiyong tanga agencies ajaki kar kübok inyaker, ta metetdaksü.

Kolkata nung jembidang Banerjee-i, tang aliba inyakyim ajangabo ochi jungkai madoktsü aser iba tatalokba ya SC-i ketdangsüa bushisüngdangtsüla, ta ashi.

Maharashtra Deputy Chief Minister Ajit Pawar den tatembangbuba asüpila sentong Brihostibarnü (January 29, 2026) anüngdang 11:00 ako nungi Vidya Pratishthan nung agitsü. Asüpila sentong nungji Ato kilonser Narendra Modi aser Union Home Minister Amit Shah na densema lenirtem aika adentsü, ta Nationalist Congress Party-i metetdaksü.



New Delhi, January 28, 2026: Budget senden mezüing anogo nung Tir, Droupadi Murmu-i House anaprong nung jembitsü atema Parliament-i apusoa aodang tangokba noksa nung angur.

West Bengal nung Nipah tashidak azüoktetogo: Centre

New Delhi, Aenjeti/January 28 (Agencies): West Bengal nung Nipah tashidak aser Thailand aser Nepal nati India nungi aoba passenger tem dak iba tashidak tendanger, ta Union health ministry-i metetdaksü.

Ministry of Health & Family Welfare-i, National Centre for Disease Control (NCDC)-i Bengal nung nisung ana dak iba tashidak putetba dak alaka tangar dakbo meputet, ta metetdaksü.

India nung nisung ana dak dang iba tashidak putet, ajisiüaka kidanger linüktemi India nungi aoba passenger tem dak iba tashidak tendanger.

Thailand nung international airport asem nung passenger tem dak iba tashidak tendanger aser Nepal nunga Kathmandu airport aser arrtsülen aliba

points nung iba tashidak tendanger.

Nipah virus ya shiruru dak nungi menazüker. Iba tashidak agi shirangertem temang metar aser tangu sashiba tsütsü timtem agütsür. Iba tashidak ya mapang shidak nung alepalu mesüra meküzmüker.

Iba tashidak atema antiviral treatment mesüra licensed vaccine mali, anungji iba wara azüoktsü atema kera tashidak puteta treatment agitsüji kanga tongtibang. Bengal nung nurse ana dak iba tashidak putetba sülen Centre sorkari West Bengal state sorkar den yaritepa iba tashidak prokba nokdangtsü atema inyak.

Iba tashidak putetba nisung ana den contact alir nisung 196 jangjateta parnok dak iba tashidak tendang saka ajak negative liasü.



January 28, 2026 nü Thiruvananthapuram nung Malayattoor Foundation award sentong nung kaketzülur, Arundhati Roy-i retired Indian civil servant K. Jayakumar ket nungi Malayattoor Foundation Comprehensive Contribution Award 2026 agizükdang tangokba noksa nung angur.

Parliament nung opposition-i MGNREGA aser SIR onüktem benoktsü

New Delhi, Aenjeti/January 28 (Agencies): Bodhbarnü Opposition party temi Parliament nung budget senden aliba mapang nung MGNREGA aser SIR onüktem benoktsü atema telemtetba agiogo.

Bodhbarnü Rajya Sabha nung Opposition lenir, Mallikarjun Kharge indang takdang nung opposition INDIA teloktep nung dena aliba opposition party tem nungi lenirtem adenshia Budget senden atema asalentong yanglua liasü.

Opposition lenirtemisa Motion of Thanks atema o entepdang, Union budget benokdang aser o lemtepba mapang nung longkak aittsü bangjem.

"MGNREGA tanaben benoktsü atema Opposition-i democratic inyakyim ajak benshitsü," ta AICC general secretary Jairam Ramesh-i X ajanga metetdaksü.

Bodhbarnü Lok Sabha aser Rajya Sabha külem senden nung linük Tir Droupadi Murmu-i jembidang opposition züngsemtemi longkak aitba aija Parliamentary Affairs Minister Kiren Rijiju-i, opposition-i benshiba yimya ya taaktsüka lir, ta ashi.

Rijiju-i, "Tanü opposition-i benshiba yimya ya linük atema

taaktsü mapa lir. Congress aser parnok den teloktep dang kodanga tai matoktsü. 'Vande Mataram' küm 150 ajungba aser Bankim Chandra Chattopadhyay nem akhüm agütsüba mapang nung opposition-i senden nung timtem agütsü," ta metetdaksü.

Kharge takdang nung amenba senden nungji TMC aser AAP nungi lenirtembo maliasü. Iba senden nung taoba mapang Congress Tir Rahul Gandhi, AICC general secretaries Ramesh aser K C Venugopal na, DMK nungi TR Baalu, Shiv Sena (UBT) nungi Arvind Sawant, Samajwadi Party nungi Javed Ali Khan, RJD nungi Prem Chand Gupta, CPI(M) nungi John Brittas, CPI nungi P Sandosh aser RSP nungi N K Premchandran nunger aden.

Mongolbarnüa Congress lenirtemi Budget senden nung MGNREGA aser SIR onüktem benoktsü atema telemtetba agia liasü.

Congress Parliamentary Party chairperson Sonia Gandhi'er kidang ayongzükbä senden nungji Lok Sabha nung opposition lenir Rahul Gandhi aser Rajya Sabha nung opposition lenir, Mallikarjun Kharge na densema party lenirtem kar liasü.



TIR YIMYIM YIMOBILEM (EDITORIAL)

DIMAPUR THURSDAY, JANUARY (AENJETI) 29, 2026

Memetetba agi meinyaker !

Nagaland state nungibo asenok lanurtem asoshi teyari tulukabo mengutettsüa akok saka center government nungi lanurtem asoshi aser ano talisa, asenok ama teküpbok tia nung aliba kin, Scheduled Tribe purtem asoshi teyari agütsütsü yangluba sentongtem agir magima lir. Item teyaritemji sen angati agütsütsüba teyari masü saka sen aatsü asoshi lenmang sayutsüba sentongtem lir. Item sentongtem ajanga kodang asenoki lenmang meteta mapa inyak tenzükdir, asen lima nungbo mapa inyaksü purtem dang nungibo mapa-ang teimba asütsü. Ajisüaka, asenok asoshi timtem kaji, asenoki mapa meinyakner mesüra makoktsü ta bilemba agi masü saka asenoki asenok mapa inyaka sen aatsü asoshi center government nungi kechi sentongsa yoka ali, itemji memetetba ajanga mapabo inyaker meinyakma lir ser nung mapa maka amai asenok amajok nung taküm arishi tatsüka nung ya mapang amajok nung süitemdaksür. Ibaji mapa mangu kazürtemji tai masü saka asenok state government mapa nung alirtem, District Administration aser bank nung inyaktertem aser lokti aser yimten nung lenirtemi item sentongtem indang metetdakja len sayutsüba ser nung, asenoki nungdakba purtem bushia oagi teyari agitsüba lenmangtem indang mashiba ajanga asen nübortem akoksadaksür. Ano, asen nisung asoshi timtem aser takoksa kaji, tang ya balaka center nungi teyari agütsütsü yokba sentongtem tenüng ajak ya Hindi agi dang jateta lir aser asenok aikati Hindi mangateter. Aji oda, tatishitsü agi, Pradhan Mantri Jan Vikas Karyakram (PMJVK) sentong ya center nungi asenok ama kin tila purtem alidak yimkong asoshi nungdakba mapatem inyaksü asoshi senotsü lezmükja aliba sentong lir, ajisüaka itemji, talisa, state government nung alirtemi nungdakba purtem dang meshira kodaser metettsü. Ano, iba ama sentong tajung ka tenüng agi, Pradhan Mantri Vishwakarma Kaushal Samridhi (PM VIKAS) ajanga asenok ama kin tila purtem rongnung teka mapa inyaktertem dang mapa inyak sayur aser mapa inyaksü senotsü teyari agütsüba dang masü saka pei yanglutetba osettemji ayoktsü asoshi tayokdak dena bushitsür. Item ama sentongtemji ano peisasa aluyimba aser business tenzüknertem asoshi bank nungi sendem kanga tajemba nung sen aputsü asoshi lenmang sadema lapoka lir. Ajisüaka, item lenmangtemji sayua yarirtem maliba ajanga, asenok ama mapa tilakabosa tenzüka inyakner saka sen maka ta timtemertem aika sentem tulu agi sen apua mapa inyaker aser sentsü maotet takoksa anguba purtem aika lir. Atangji, tesem kar nungbo state government nung tenzükertem aser bank nung inyaktertemi nübortem tonga oagi government sentongtem ajanga mapa inyak ashitsüsa training agitsü aser sen apur mapa tenzüka inyaksü asoshi lenmanga sayuba angur, ajisüaka ano asenoki temulung agüja mangazüker aser mapa tilaka nungi tenzüka meinyaknuba jakla ka asenok dak lir, anungji mapa tilakata metenzüktet aser tulukata meinyaktet ta taküm nung mapa inyaksüba mapang tajung süitemdaksür. Lanurtem asoshi balaka center aser state government sentong nung gari lenmang yangludang amshiba ali atuba, ali anungba aser blacktopping yangluba machine-tem amshiba mapatem angati angazüktsü asoshi lenmang lapokja lir, saka asenoki mangazükner aser ashiko angazükneritemibo item sentongtem indangja memetet asütsüa akok. Asenok ajak asoshi tia majung kaji, item ama nübortem yaritsü asoshi sentong den senotsü teyari yokba lenmangtemji sayutsü purtemi mesayuner, anungji mimbanga ayur aser shitakba teyari angutsü purtem dang temeim agi lenmang sayua ajungshir masü saka tajurua majuruteptettsüa asenok lenirtem aser tesayutsü purtem alir. Ashiko, asenoki asen kija ajangzüktsü atema inyakbajang tajung amai bilema alitsüa akok, saka ibaji asen tarutsü nung lendong tulu ajurutsü inyaker asütsü. Asenoki metettsüba kaji, kodang loktiliba nung takar kasa kanga takar aser makar kabo chiyongtsüa maka ta asütsüsa atalokdir, iba tensa tiaji makartem asoshiji masü saka takartem asoshi kanga lendong mapanga ta angatettsüla. Iba ama lendong mapangji paidoka asenoki akok tashi asen nübortem dang mapa angazükdak aser teyari angudak lenmang sayutsüla aser nübortemiji itemji temoatsü kuma agizüka inyaksüla.

OLEMSABANG

TSÜRABURJI ALIMA NUNG TENUKI ANGUBA TANABUBA TSÜNGREM LIR

~ L. Kika Pongener.

Alima nung arishia, azükaroa, taküm junga linura, tsürabur dang akümtsüba aser meima benshitsüla, kechiyong tsüraburji alima nung tenuki anguba tanabuba Tsüngrem lir. Asenoki asen tsürabur dang Tsüngrem dang koda akümtsübur aser tashi angar yamaji benshitsüla. Tsüngrem o-i ashir, "Na asoba nebu dang angang, aser netsü tantsür akümdang tesempa". "Nebu aser netsü peladakjang, aser na asola peladakjang" (A.Shin-23:22 & 25). Tsürabur dang akümtsübutsuba aser tashi angatsübaji...Tsüngremi lateta yutsüba ozüng lir. Tsüngrem o-i ashir, "Tanürtem Kibuba nung nenoki pei tsürabur dang tashi angang ; Kechiyong aji tim. Na junga alitsü aser alima nung arishia alitsü asoshi, nebu aser netsü aküm tsübuang. Ibai tenangzükba aketba mezüng ozüngji lir" (Efesa-6:1-3). Iba laishiba nungi asenoki angateter...Tsürabur dang tashi anga-a akümtsübutsubaji tim mapa lir. Kechiyong shirnoki tsürabur dang tashi anga-a akümtsübur parnokji alima nung junga alitsü, arishi talang alitsü aser azükaroa alitsü. Tsürabur dang tashi anga-a akümtsübutsubaji tenangzükba aketba mezügbuba ozüng lir. Aji oda, tenangzükba aketba ozüng ta asübaji...Inyaknura inyaksü aser meinyaknura meinyaksü ta masü; saka kechi sudir suaka inyaksüla...ta ashirba. Tetezü...Iba tsüzüng-ozüngji tashi mangara temerenshi lir ta shinur. Mosa ozüng ter nunga tsürabur dang akümtsübutsuba indang shia angur. "Nebu aser netsü akümtsübuang, angji Kibuba ne Tsüngremi koba linuk ne nem agütsür, yangji na arishia alitsü" (Anitet-20:12). Anungji tsürabur dang akümtsüba aser meima benshitsübaji kanga ret-retta benshitsüla; kechiyong ibaji Tsüngrem'er ozüng lir.

Shirnoki Tsüngrem dang ama; tsürabur dang meima aser akümtsüba benshir; parnok taküm aser kibong nung teka mapa, alu ayimba, shiruru metsü-menaba, shishilempaba, tenzüka mapa aser kechisarena ajak nung azükaroa alitsü. Temang nunga tashitak tamajung kecha meli-i anema pela-a alitsü. Chirnur aser semchi-semnur jenjang tajung kümdaktsütsü. Shirnoki tsürabur taküm alidang, parnoki chinuba chiyongtsü aser parnoki subonuba aben-suoshi; aseni akokba tashi agi anepalua pela-a lidaktsür; parnok peladaktsüba temoatsüji asenok taküm aser kibong nung lenmang aisu nungi asenok dangi meyipa arutsü. Atangji, tsürabur dang meima aser anepalua, parnok pela-a lidaktsüba temoatsüji; kibong nung azükaroa alitsü; taküm anema junga alitsü; chirnur jenjang tajung akümtsü, aser semchi-semnur tajung moatsütsü. Alima nung iba temoatsü dakji alema, tanga temoatsü tuluba kecha mali. Ajisuaka, shirnoki tsürabur taküm alidang parnok küküa jashitsüsa o tamajung shia, mesenmetoa, sensamasa-a aser aküm-metsübui benshidir....Tsürabur suadoker külen, kibong nung azükaro masütsü, taküm nung anema junga malitsü, chirnur jenjang tajung makümtsü aser kechisarena ajak nung temoatsü malitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sri Lanka nung Khristan putir ka dak azüker police trok puogo



Sri Lanka nung putir ka dak azükba anema longkak aitba noksa nung angur.

January 28, 2026: Sri Lanka nung Khristan putir ka dak azükba anema Khristantemi longkak aitba sülen iba ken o dak sendakba nung police trok puogo.

Gampaha nung putir Milan Priyadarshana putir süoshi semer motorcycle ka nung toudak mapang nung police motorcycle unit kati pa arishia liasü, iba sülen parnoki pa dak züker lenmang tezülen yutsü.

Iba tatalokba sülen putirji hospital-i anir oa treatment agi.

Sri Lanka nung Catholic Arogoi iba tatalokba dak sendakba nung Supreme Court nem temepishiba ken o ka agüja liasü, aser iba nungji ajemdaker police trok apu. January 29 nü court nung ken o angadanga parnok maitsü jangjatsü.

Putir dak azükba sülen Negombo Municipal Council kima Khristantemi iba tatalokba

anema longkak aita liasü.

Osangbener den jembidang Sadasarana Congregation nungi Sister Malathi Dassanayake-i, "Ozü adianu putir ka dak azükba ya onoki kanga sahia aitsür. Pa pusema onoki iba tesem nung tesünep nung longkak aiter. Meimchir ka anema inyakba aser raraba hadir bena malir ka dak azükbaji onoki sashia aitsür," ta metetdaksü.

MP sorkari Protestant Arogo meyong ali agitsü tetuyuba agütsü



Indore Christian College

January 28, 2026: Madhya Pradesh state sorkari küm 140 tain Protestant Arogo ka indang college aliba kimong agitsü atema tetuyuba agütsü.

Iba liji tim masüba nung commercial atema amshir, ta ketdangsertemi tai tonglokja Arogo meyong ali rakzüksü meranger.

Ali acre 4.2 ya Indore yimti nung lir. Protestant Arogo indang Indore Christian College indang kimongji sen billion 4 shi asütsü ta asadangteter.

Indore district administration-i ashiba agi, iba liji 1887 küm taoba mapang Holkar dynasty-i hospital aser school asütsü atema Canadian Mission ka nem agüja liasü. Ajioda kasa küm nungjisa missionary temi tetsürtem atema college ka asü aser kümtem süia aodangbo iba college ya kanga nüngtugu shisaliok reju ka aküm.

January 23, 2026 nü District Collector Shivam Verma-i, iba li ya mission atema agütsü, saka tangbo mission ji mali, ta shia iba li tanaben agitsü tuyua liasü.

Tangbo iba tesem nungji tetsürtem hospital mali aser college-a tanga teloki ketdangsür aser fees agir, anungji tangbo iba kimong ya ozüing alema business inyakba tesem ka kümogo, ta Verma-i metetdakja liasü.

January 27 nü osangbener den jembidang College Principal, Amit David-i, "Onoki iba tetuyuba anema Madhya Pradesh High Court nung ken o benokogo," ta metetdaksü.

Principal-isa, iba li ya 'lease' asüba masü saka Arogo nem agütsüba lir, ta ashi.

Paisa, tang iba ken o ya High Court Indore bench-i angadangdar, ta metetdaksü.

Arogo ketdangser kati, college management-i college fund atema sorkar dang iba li shilem ka nung commercial dokan lapoktsü asüngdanga liasü, ajisüaka iba temepishibaji Arogo aitsütsü atema amshir, ta metetdaksü.

District Collector-i ketdangsertem dang, anogo asemnü tsüngda Arogo liji state sorkar tenüng nung register

süang, ta tuyua liasü, ajisüaka hopta tatembang tenjiba den külemi Hombarnüa Republic Day asüba ajanga DC-i tuyuba amaji meinyaktet.

Tang iba college nung kaketshir 2,300 shi lir. Iba college nung undergraduate aser graduate programs 17 lir aser kaketshir karbo tatidang agütsütsü renemdar.

Arogo lenir kati, "Sorkari tashiyim amshia iba li rakzükra kaketshirtem dak kechi ataloktsüar memetet. Iba atemaji onok shisabulur," ta metetdaksü.

Tang Madhya Pradesh nung BJP sorkar lir. Mapang shia Hindu nationalist teloktemi tiyazü nung Khristan rejutem nem tai tongloksür, ta Arogo lenirtemi metetdaksü.

Tang state 12 nü anti-conversion ozüing benoka lir aser item state tem rongnung Madhya Pradesh-a densema lir.

Nütsüng million 72 aliba Madhya Pradesh nung nütsüng shilem 0.27 dang Khristantem lir. Iba state nung nütsüng shilem 80 bo Hindu nungertem lir.

ANOGO ABEN TSÜNGREM DEN

Alima ajak nung Arogo

Parnok ola ajaklen aser parnok o tem alima tatem tonga ao. Rom 10: 18.

Khristan yimsü ojang ana nung ratettsütsü akok: "ARUNG" aser "OANG". Mezüngbuba oji osangtajung tajaba. "Nenok tebelemer aser khu reta abener ajak Kü dangi arung..." (Mathi 11: 28). Tanabuba oji missionary ozüing "Alima ajaki oang..." (Mark 16: 15).

Küm 2000 dak tali arogo-i iba ozüngji angashia arur aser Pa o aser temeshi ozüing nung Tanela Temeshi teyari dena ibai atalokdaksütsü meranger. Aser iba nungi adokbaji tejangja angur. (Rom 10: 18).

Missionary arogo kaji taküm aliba arogo ka lir. Kidang aser tezülen shirnoki terongdak tekümtet osang mangashi-i lir parnok atema Khristan-temi mebilemra arogoi iba senmang samatsür. Tangar den tanela sempettem lemsatepba ajanga, arogoji tali tashi aiter aser telung takümji tali kümdanga akümer.

Missionary arogo nukjidong mapaji tangar dang aseni sobuba ama sobutsü, aseni inyakba ama inyaka alitsü sayutsüba masü, Khristan mission nükjidong tulutibaji temenen taidok, taküm aser tekümtet Khrista ajanga anguba sangdongtsüba lir. Iba asoshi arogoi "Ne yimli arung" ta sarasademtsüla.

Ao Kin Temenen Nangzükba Anogo

Ao lima tenem Yisu dak mamanger kintemi meketpanger putusa putu lia aru. Saka parnok tamangba yimsütem agi asenok metangshi liasü. 1872, nung tzüyim tekong jenti atena oa aliba temesüng nisung Dr. E.W. Clark ajanga, Tsüngremi alima makümdang nungi renema aliba sentong, Yisu Khrista osang bener Aor dangi aru.

Shi nung mangsa aliba sübutsü sayu, shisatsü nung nüji terenlok tenzüksü, tanela nung Yisu Khrista temeim aser taküm asentenshi yangertsü.

Ao lima tenem nung tenzük saka Naga nunger ajak asoshi nükmen aküm. Küm noklang ka ser tenemsür asem (153 years) arur, iba nükmen nung jenti rena aruogo.

Aor akhi jenjang khen lepa reprangdangra ajak nung samanir sür, aruba tanü aseni Tsüngremer tenangzükba amadok nung aki jenjang dang nungi teküpok jenjang kati aluogo. Ajaki khen shisadangdi. Tanü asen Aor libaliro, tamang tia asadangra Tsüngremi memeimtsüsa kümogo, Tsüngremi Israel nunger dang "nenok kü nübur masü aser ni nenok Tsüngrem masütsü" (Hosea 1:9) ta ashiba ama, asen Aor jenjang kümogo.

Temenen yimli den nüktapangda benshia, asen benjongbentsü Tsüngremi sempar, temeshi mungdang sentepba nunga Pa mepelatsüsa aliba. Hau asenoki kechisarena tenlar, saka Tsüngremi magizüktettsüsa, asenok tenüngsang tenlatem Tsüngremi mezüngshitsüsa litetba tia nung lir. ochiba agi taku aser temeshiba süngjang miim kümdaksüogo.

Saka Kibuba waitsü nung tsükjang ano metsükdaksüi atapesa Aortem dang Tsüngremi atasaba mapang ka ta amanga iba 30-31 January 2026 "Ao Kin Temenen nangzükba anogo" sentong ya ayongzüker.

2 Putipuyang 7:14 "Kü nübur shirnok kü tenüng agi ja-a lir parnok sasa ajemaludi süra, aser sarasademra, aser kü tejak Bushira, aser parnok lenmang tamajung nungi meyipra, idangji ni kotak nungi angashitsü, aser parnok lima anebsütsü." Amos 9:11, "tekülemdak süki laoa aliba ni mesotsü, aser iba teraksa atepteptsü, aser pa teraksa ni mesotsütsü aser akhidang aliba ama ni aji yanglutsü"

Arung asen Aortem! Arung! Asen lenmangtem bilemdangdi, süoshi masü temulungjang shisa-a mang yima Tsüngrem temeshiba bushiteta Pa dangi meyipdi.

Apijemtsü Shin 28:13 "Shibai pei ozüing raksaba meimdir azükaru masütsü saka Shibaisa itemji nangzükdir aser toktsüdir yimlibilem angutsü".

AO OSHI ANGAZÜKDAK:**TANÜ ANGAZÜKTSÜBA OJANG****Twangwang****(adj)** nisung taküm nung sentsü aketdang mesüra tajung dang (dynamic, energetic)

* Nisung taküm nung twangwang mapang tebilemba ajak inyakteter.

Twi**(v)** tesempa agi metzü metsüloktsüba (spit out as an expression of cursing)

* Nisungtemi twi ta metzü metsülokja auersang meindok.



Tir Yimyim

OLONG PAITEP # 7398

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7397 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

Gujarat kübok Navsari nung January 9 nungi 11, 2026 tashi mezügbuba flower show ayonga agidang Guinness World Record ka ngutetogo. Navsari Municipal Corporation (NMC)-i ayonga agiba sentong nung naro agi "NAVSARI" ojang zülü aser iba ya feet 49 talang aser metonglen feet 8 liasü. Iba ojang züluba nung fresh flowers 95,000 tema amshia liasü aser Guinness Book of World Records-i "largest word made entirely of flowers" naroküm agütsüogo.

Manipuri film Boong-i BAFTA 2026 nomination angu**Imphal, January 28, 2026**

(Agencies): BAFTA (British Academy of Film and Television Arts) 2026 nung Best Children's and Family Film category kübok Manipuri film Boong züngsemogo.

Lakshmipriya Devi-i direct aser züluba film ya French filmmaker Ugo Bienvenu indang Arco, Dean Fleischer Camp indang Lilo & Stitch aser Jared Bush o Byron Howard nati direct asüba Zootropolis (Zootopia) 2 film tem den külemi züngsema lir.

Boong ya Excel Entertainment, Chalkboard

Entertainment, aser Suitable Pictures ajanga produce asü aser 2024 Toronto International Film Festival nung world premiere asüba ajanga alimai meteta aküm.

Iba film nung Manipuri yimtsüng ka nung tanur ka pa tebu Joykumar samar tetsü den aliba otsü lir.

Joykumar ya state adena orr mapa inyakba sülen par kibong toktsür kuli kecha melii dang sama. Tanubosangi tetsü nem sempet tajungtiba agütsütsü nükjidong yur pai pa par medemer ka den tebu bushii aoer.

Boong ya September 2025 nung India ajungalen PVR INOX cinemas ajanga sayua liasü.

"Kü English majungba agi kaket mezülutetbaji Boong ya liasü. Iba film ya ni tanur asüdang kütsü'er (grandmother) tar nungi otsütem ajanga ajungmesoba liasü. Manipur nung nübortem akangakanga noktakba asoshi iba film bendanga agütsür" ta director Lakshmipriya Devi-i ashi.

"Manipuri film ka India ajungalen sapua reprangba ya mamanger aser kanga pelaa bilemer" ta laisa ashi.

Kangpokpi R-Day benjung nung amtsük tamajung alem**Imphal, January 28, 2026**

(Agencies): Kangpokpi District Headquarters nung 77 buba Republic Day amungdang 'expired biscuits' alemba atema ketdangsürtemi bushisüngdang asütsü tetuyuba agütsüogo.

Kangpokpi jila nung Republic Day official programme nung shilem ka ama amtsük lema agütsü aser idangji amtsük pongdang ana mapang süiadoker

aliba angu. Public-i iba osang ya metetdaksü ta Kangpokpi Town Committee (KTC)-i ashi.

Iba tatalokba atema Sadar Hills Autonomous District Council (SH-ADC), Kangpokpi-i KTC dang bushisüngdang asütsü aser nüngdakba mapa inyaksü tetuyuba agütsüogo.

KTC-i refreshments agütsüba supplier jaoka

asüngdangya asüdang pai aibelenba nangzükogo aser district ketdangpurtem o public dang tatok meshiogo. Iba ya asaa inyakba masü saka zübazülema inyakba ta ketdangsürtemi ashi.

Kangpokpi Town Committee-i tang nungi public sentongtem nung food items aser tanga supplies jungjunga reprangtsü tetuyuba agütsüogo.

India Energy Week 2026 nung Assam handloom tetshir**Guwahati, January 28, 2026**

(Agencies): Goa nung India Energy Week 2026 amungdang Assam nung handloom heritage takar sayur.

Iba sentong nung Assam tsürtemi 'Threads of Assam - Woven by Baidews' ta ser sobaliba senmang, tetsüri aniba entrepreneurship aser community development sayur.

Iba energy exhibition nung tetsür teka mapa inyaker 5,000 jungnüai handwoven textiles sayur.

Assam kübok Borchapori aser Agchamua nungi handloom centres tenüng nung entrepreneurs-i gamosas, mekhela chadors, saris, jackets, scarves, handcrafted bags, aser pillow covers amala products aika sayur. Item ya muga aser

eri amala indigenous silks ajanga yangluba lir.

India Energy Week 2026 ya taküm agi küm pezübuba amunger aser taküm January 27 nungi 30, 2026 tashi amungtsü.

Iba sentong ya Ministry of Petroleum and Natural Gas ajanga ayongzüker aser policymakers, industry leaders, innovators, o investors adener.

South Korea taoba first lady tepuokdaki yokogo



Seoul, Aenjeti/Jnuary 28 (Agencies): South Korea nung okdak kati taoba first lady Kim Keon Hee-i yimden yimsüsüba nung teyari agütsüsü atema Unification Church ketdangsürtem ket nungi Chanel yangku aser diamond pendant ka agizükba atema ita 20 tepuokdak ayutsü obendang agütsüogo.

Taoba tir Yoon Suk Yeol, shiba taoba kum mapa nungi anenja liasü, pa kinungtsü stock jenjang melenshitsü merangba aser political funds act anema

inyaksangshiba atema aitsür aliba nungibo jenbogo. Iba anema Prosecutor temi ken o benoktsü, ta media sangdong ajanga metetdaksüogo.

Yoon-i 2024 kum mapang tatsüka atema martial law benokba dak sendakba nungi adokba ken o tem aika obendangyonga aoba mapang nung tang iba obendang ya agütsüogo.

Kim-i la anema ken o benokba magizük aser la okaktsüri ashiba agi, lar team-i Seoul Central District Court-i

iba obendang agütsüba ya asadangshitsü aser sübokrem agiba atema aitsüba atema temepishiba agütsüsü magütsüsü telemteba agitsü.

Okadaki la dang senchi won million 12.8 chiogo aser azük ya meshia ayutsü tetuyuba agütsüogo. Kim ya taoba kum August ita nungi sota yua lir.

Ken o benokba nung lai aibelena aliba ngutetra la kum 15 tepuokdak ayutsü aser senchi won billion 2.9 achitsü atema prosecutors temi takhangba agütsür liasü.

Kim indang okaktsüri ashiba agi, "lai okakdai la aitsüba ajemalua agizükogo aser nübürtem nem timtem agütsüba atema sasa bilemba lemsatepogo."

Ken o ana nung aibelena mali ta obendang agütsüba sülen Yoon aser Kim pusemertem okadak kima pelatepa liasü.

Unification Church-i ashiba agi, sempet agütsüba melena parnoki kecha imla maliasü. Parnok lenir Han Hak-ja, shiba tang trail nung lir, paia pai Kim nem sübokrem agütsüsü memerang ta shiogo.

Pakistan kübok Tirah tesem nungi nisung meyrejang aika jenshi

Islamabad, Aenjeti/January 28 (Agencies): Pakistan northwest len Afghanistan den arrtsü nung aliba Tirah tesem nungi nisung 70,000 dak tema Pakistan Defence Minister jenshiogo. Military-i Pakistan Khawaja Muhammad Asif-i, Taliban amaktsü akok ta tsübua iba tesem nung alirtem aser... bilemba mapang iba tesem nung (Maneni tapak 8 nung...)

MULUNG NEN O

ASO :
25/12/1967



ASÜ :
22/01/2026

Onoki kodanga amatsü makokba tasü tait tetsü asür **Sentongmongla** (Longsa), mapang tatsuka shirang yipden nung aliba mapang nungi asüba anogo 22/01/2026 tashi nübürtem shirnokisa takum mapang aser rongsen tenlaa yaritepogo, nenok ajak dang tepela lemsateper. Tajung Tsüngremi nenok takum kibong maneni moajang ta ozü sarasadem.

Temeim kinunger, adianu aser Chirnur.

TASOBA ANOGOMONG

"Asangur tashiji parnok sentsüwangshi; saka kupu kolakji tambur tobur ajung." A-Shin 20:



Tsüngremi temeim aser taochi tulu ajanga tanü Dated 29-01-2026 ozü tsürapur **Mr. Sosangmar Lemtur** (Longmisa) tasoba (Birthday) kum 80 ajungba tepela aser tenüngsang lemsateper. Tsüngremi ano maneni tsürapur nem Tsüngrem sentsüwangshitsü asoshi takum tajung aser arishi maneni moajang.

~ Temeim Kinungtsü, Chirnur, Semchir aser Anükapang.

ALI TAYOKTSÜ LIR

Sainik School, Punglwa anasa main road nungi 600m pilar. Kimong ajak nung approach road lir. Tasazük mashi angutsü. Jenjang: Rs. 40 per sq. ft. Contact : 9856509817 / 8794786752

Indonesia alinen lendong nung samar alibanisung 32 monguteter

Bandung Barat, Aenjeti/January 28 (Agencies): Indonesia indang West Java province nung alinen agi kongshir anogo pongu sülena nisung 32 tang tashi monguteti aliba bushiba maparen nung tzünglu aruba ajanga timtem agütsür, ta disaster mitigation agency ajanga Bodhbarnü ashi aser iba lendong nung asür nisung 34 jungogo.

Bandung Barat region kübok Pasir Langu yimtsüng nung alinen ya Deobarnep alua liasü, koba anogo ka tejakdang nungi tzünglu kanga sashia aruba ajanga alu.

Samar alirtem rongnung Muhammad Rifal Frimansyah tenu arishi kum 14 tain ka lir. Rifal ya tesüba anogo pezü tashi alinen aluba tesem nung mulushi aser long yateta rescuers tem dang pa tetsü, tebu aser teti indang noksa tem pa indang phone nung sayua liasü.

Pa tetsü aser tebu tasü mang Mongulbarnü ngutet saka teti tang tashi samar bushir. Kinunger aika monguteti lir, ta pa tetsütanutsü ashi.

Rifal ya kilometer 50 shi pilar Islamic boarding school ka nung lia alinen alu aser pai iba lendong atalokba osang ya par kinunger ka nungi angashi.

"Ni kidang alir ajunga den phone südang saka katia melangzü. Iba sülen alinen yagi ozü kidang kongshiogo ta ni metet. Ni ajep. Taoba mapanga alinen alua liasü, saka tulu masü, koba ozü ki tejaklen alema alu. Tangbo iba alinen yagi ozü ki ajunga anenbang aser ajak samaogo," ta pai ashi.

Iba yimtsüng ya Indonesia yimtiba Jakarta nungi southeast tsütsü kilometer 100 shi pilar tenem ka nung lir.

"Alinen aluba tesem nung tanepa tzünglu aru saka rescuer ajunga maneni samar alirtem bushitsü renema lir, aser

mapang tetemsü atar," ta disaster mitigation agency odongtar Abdul Muhari-i ashi.

Iba lendong nung taoba mapang nisung 20 asüba jangjar aliba tang 34 jungogo. Ano nisung 23 iba lendong nungi takum kumzük. Border patrol training agiba mapang sepai 23 asü, ta Indonesian Navy ajanga Mongulbarnü ashi.

Tang tesüsa asürtem osang sangdongba nungya item sepaitem ya aden asü madenar mejangja, ta Muhari-i ashi.

Nisung tasü mang jangjatetsü asoshi telok ka iba tesem nung mapa inyaktar, ta Muhari-isa ashi.

Samar aliba nisungtem bushitsü atema rescuers, mitkar aser police 800 shi den excavators toku yoka lir.

ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110 029
EXAMINATION SECTION
Advertisement No. 03/2026

Recruitment Examination for Group-A (Non-Faculty) (REGA-2.0) for AIIMS, New Delhi & Pasteur Institute of India, Coonoor, Tamilnadu

AIIMS, New Delhi aser Pasteur Institute of India, Coonoor, Tamil Nadu atema Group-A (Non-Faculty) posts balala recruitment atema India senso nungi online application meshir. Posts tejangja & eligibility ya advertisement aliba AIIMS website i.e. www.aiimsexams.ac.in nung angutsü. Examination ya online (CBT) mode kisüing nung agitsü aser iba sülen teshimtet candidates atema temsüa aliba repranga screening aser DWT (Descriptive Written Test) alitsü.

Online Registration for applications	
Opens on	Closes on
22 nd January, 2026 (Thursday)	20 th February, 2026 at 5:00 pm (Friday)
Date of Recruitment Examination	
Date of Exam	Examination Centre in the State
Tentative in the month of April, 2026	Delhi/NCR, Maharashtra, Tamilnadu, Kerala and West Bengal.

Tongtipang : Applicants ajungai AIIMS website i.e. www.aiimsexams.ac.in mapang shia reprangtsüla, kechiaser iba sülen temelenshi/metongshiba/Updates ajunga website nung kisüing inoktsüsü.

Sd/-
CBC : 17112/12/0068/25/26

ASSISTANT CONTROLLER (EXAMS.)

भारतीय पास्चर संस्थान
कुत्र 643 103, नीलगिरी, तमिलनाडु
PASTEUR INSTITUTE OF INDIA
COONOR 643 103, NILGIRIS, TAMILNADU

Pasteur Institute of India, Coonoor ya autonomous body ka ama Ministry of Health and Family Welfare, Government of India, New Delhi kübok lir. Tsünglanglen agüja aliba Direct Recruitment posts asoshi advertisement nung tejangja agüja aliba ama temsüa aliba candidates nungi online application meshir.

S. No.	Name of the Post	Pay Level as per 7 th CPC	SC	ST	OBC	EWS	UR	Total
1.	Research Officer	Level – 10 (Rs.56100-177500)	1	-	1	1	1	4
2.	Veterinary Assistant Surgeon	Level – 10 (Rs.56100-177500) + NPA	-	-	-	-	2	2
TOTAL								6

Online application portal ya www.aiimsexams.ac.in nung angutsü: Advertisement tejangja Notice No.03/2026 dated: 22/01/2026 for Recruitment Examination for Group-A (Non-Faculty) - REGA-2.0 for AIIMS, New Delhi and Pasteur Institute of India, Coonoor nung angutsü. Online application ya **20.02.2026 nikongdang 5.00** ako tashi alitsü. Iba osang tejangja Institute indang website: www.pasteurinstituteindia.in nunga angutsü.

CBC : 17178/12/0005/2526

निदेशक/DIRECTOR

A02026: Djokovic, Elena, Jessica nunger semifinal-i iogo

Aenjeti/January 28, 2026 (Agencies): Grand Slam 24 koker alisang Novak Djokovic, tang asaya aliba Australia Open nung maneni kanga tia ka-a quarterfinal nung Lorenzo Musetti yirur masayatetsüsa akümiba ajanga semifinal-i iogo. Iba asaya ya Novak-i set ana mekoki liasü.

Iba asaya nung Musetti 6-4, 6-3, 1-3 agi tejakdang aliba mapang pa tetsüing tachichilen yiruba ajanga masayatetsüsa aküm.

Iba asaya tia ka akokba sülen Melbourne nung iba asayamung 10 ben koker alisang ya semifinal nung defending champion Jannik Sinner mesüra America nunger eighth seed asayar Ben Shelton na rongnung ka den asayatsü.

Djokovic ya taoba küm nungi Grand Slam 25buba akoktsü atema meranga arudar,

saka Sinner aser Carlos Alcaraz nati maongk magütsüi arudar.

Iba asaya akokba sülen Djokovic Grand Slam 54buba semi-final-i iogo. Ajisüak pa taküm junga masayateti arudar aser pai Musetti den asaya nung mezüingbuba set kija nunga unforced error 18 mena aser ajak senteper aibelen 32 mena liasü.

Kasa asayamung tetsür kija asaya nung Elena Rybakina aser Jessica Pegula nati pei tata asaya akokba sülen tena semifinal asayatsü. Tenati Iga Swiatek aser Amanda Anisimova na tsükdakja liasü.

Wimbledon tesüsa koker alila aser second-seeded Swiatek, shiba Australia Open mezüingbuba akoktsü meranga asaya liasü, la Rybakina-i straight set nung kokogo.

Rybakina-i iba asaya ya 7-5, 6-2 agi akok aser la indang

career nung Grand Slam tanabuba akoktsü maongka lir.

Rybakina 2023 kuma Melbourne nung final tonga asayaago, saka la Aryna Sabalenka-i koka liasü.

Asaya nung Rybakina-i aces 11 ao aser winner 26 angu aser tatembangbuba game teku nungi tibo koka liasü.

Kasa mapang nung Pegula-i külem America tsür Anisimova 6-2, 7-6 (7-1) agi straight set nung kokogo.

Pegula-i taküm Melbourne nung set ka nung danga tamakok ngua mali. Arishi küm 31buba nung la tang mezüingbuba Grand slam ka akoktsü atema meranga asayadar.

Asaya nung Anisimova-i aibelen aika menaba ajanga Pegula nem teyari agütsü. Anisimova-i aibelen 44 mena liasü.

West Ham-i Fulham nungi winger Traore alizükogo



Aenjeti/January 28, 2026 (Agencies): West Ham-i Fulham nungi winger Adama Traore pound million 2 agi alizükogo.

Arishi küm 30 tain asayar ya London anüdoklen nungi anüoleniogo, kong pa Nuno Espirito Santo den longjemtsü, shiba den pa Wolves nung külemi asaya liasü.

Tenangzüktepba ya pound million ka alang lir aser add-ons bendenlokba sülen pound million 2 ajungtsü akok.

Traore ya Spain team nungi tiben asayar lir aser pa iba season Fulham nungi Premier League nung anaben dang tetenzük nungi asayar liasü. Pa Honibarnü Brighton goal 2-1 agi akokba asaya nung masayai liasü.

"Ni idaki aruba atema kanga pelar aser ni akokba tashi team nem teyari agütsütsü aser kü sempet sayutsü pela bilemer," ta Traore-i ashi.

"Kü tebilembaji teti tajungtiba asayatsü asoshi lir. Ni asayar ka ama teti renloka oner aser ni teti ashiba ama team nem takok tashi teyari agütsüner.

"Ni tayongzüba balala kokyonga aotsü janrar. Asaya ka nungi asaya ka ta asayayonga aotsü merangtsü," ta paisa shisem.

Traore tatemsa January 10 nü FA Cup nung Fulham-i goal

3-1 agi Middlesbrough akokba asaya nung asaya liasü.

Traore career ya Barcelona nung tenzük aser Aston Villa, Middlesbrough aser Wolves nung asayaba sülen 2023 küm Fulham nung dena liasü.

January transfer window nung West Ham puri Gil Vicente nungi pound million 20 agi Pablo Felipe alizükogo aser Lazio nungi pound million 25.2 agi Taty Castellanos alizükogo.

Maneni parnok midfielder Lucas Paqueta Flamengo dang ayoktsü jembidar aser Valencia dang Guido Rodriguez aser Sporting dang Luis Guilherme yokogo aser Germany nungr asayar Niclas Fullkrug loan nung AC Milan-i ogo.

Hammers puri point 20 ngua maneni relegation zone nung lir aser parnok asaya 15 asayatsü anunga lir.

ICC T20I Rankings: Suryakumar jenjang 5 tejakdangi tuogo

Aenjeti/January 28, 2026 (Agencies): Bodhbarnü sayaba ICC men's T20I rankings nung India captain Suryakumar Yadav jenjang pongu tejakdangi tua tang tenetbuba nung lir. New Zealand den dang India nung asaya aliba asayamung nung kanga junga asayaba sülen pa jenjang junga kümogo.

Taoba mapang No.1 batter yagi asaya asem nung run 32, 82 aser out mesüi run 57 yanglua liasü. T20I rankings nung Abhishek Sharma No 1 aser Tilak Varma tasembuba jenjang nung lir.

Ishan Kishan shibai Raipur nung tanabuba asaya asayaba mapang ball 32 nung run 76 yanglua liasü pa 64buba nung lir aser Shivam Dubey (jenjang 9 tejakdangi tua 58) aser Rinku Singh (jenjang 13 tejakdangi tua 58buba) nata jenjang junga



kümogo.

Afghanistan nunger opener Ibrahim Zadran aser Rahmanullah nata jenjang junga kümogo. Dubai nung West Indies 2-1 agi akokba asayamung nung kanga junga asayaba sülen tena jenjang junga kümogo. Ibrahim jenjang ana tejakdangi tua 13buba aser Rahmanullah jenjang asem tejakdangi tua 15buba nung lir. Iba asayamung nung Darwish Rasooli Player-of-the-Series

liasü aser pa jenjang 29 tejakdangi tua 87buba nung lir.

South Africa captain Aiden Markram-i West Indies den mezüingbuba asaya nung ball 47 nungi out mesüi run 86 yangluba sülen pa top 20-i iogo aser West Indies nunger asayar' Brandon King (35) aser New Zealand nunger asayar Glenn Phillips (44) nata jenjang junga kümogo.

T20I bowling rankings nung Afghanistan nunger spinner Mujeeb ur Rahman jenjang pongu tejakdangi tua tang tekububa tongogo, Jasprit Bumrah-a jenjang pezü tejakdangi tua 13buba aser Ravi Bishnoi-a jenjang 13 tejakdangi tua tang 19buba nung lir.

India nunger bowler Hardik Pandya jenjang 18 tejakdangi tua 59buba nung lir. Batter tem rognunga pa 53buba aser all-rounder tem rongnung tasembubai tuogo.

T20 WC nung asayatsü atema Pak team sorkar nungi temelaba atadar

Aenjeti/January 28, 2026 (Agencies): Pakistan team taruba ita T20 World Cup nung asayatsü mejangja aliba mapang ka nung Mitchell Marsh-i anir Australia T20I squad Pakistan den asaya asem atema Bodhbarnü Lahore tongogo.

Iba asayamung ya Pakistan team atema T20 World Cup asoshi tatembangbuba terenemshiba asütsü, saka team Word Cup nung asayatsü atema sorkari temelaba agütsütsü magütsütsü mejangja, koba February 7 nü tenzüktsü lir.

Pakistan Cricket Board (PCB) mendenbuba Mohsin Naqvi-i ashiba agi, Pakistan Ato Kilonser Shehbaz Sharif den ajurutepba sülen ashiba agi, kechi ang ataloktsüar mejangja aser tatembangbuba telemtetba ka Hokolbar mesüra Hombarnü agütsü.

International Cricket Council's (ICC)-i T20 World Cup nung Bangladesh melena Scotland shimba atema Pakistan-i ICC aitsüogo. Bangladesh Cricket Board (BCB) aser linük interim sorkari security dak sendakba nung tebilemtsü lir ta shia India nung oa asayatsü memulungba sülen Bangladesh team World Cup

nungi agina liasü.

ken o mejangjai liaka Pakistan-i World Cup atema squad sangdongogo. Squad nung asayar ka dak alaka Australia den asayatsü atema shimba asayar kasa dang lir. Fast bowler Muhammad Wasim Jr World Cup squad nung mezüingok, saka pa Australia denbo asayatsü.

Australia team nung Pat Cummins. Cummins, Josh Hazlewood, Glenn Maxwell, Tim David aser Nathan Ellis nunger densema asayar tejen aika mali. Parnok ajak ya Pakistan den asayamung atema anisüingzük agütsüogo.

2022 küm sülen Australia team tang mezüingbuba Pakistan nung oa asayatsü lir. Team nung Travis Head, Cameron Green aser Josh Inglis nunger densema lir.

Australia squad: Mitch Marsh (c), Sean Abbott, Xavier Bartlett, Mahli Beardman, Cooper Connolly, Ben Dwarshuis, Jack Edwards, Cameron Green, Travis Head, Josh Inglis (wk), Matthew Kuhnemann, Mitch Owen, Josh Philippe (wk), Matthew Renshaw, Matt Short, Marcus Stonis, Adam Zampa.

BENDANGLI OSANG : Tapak 7 nungi...

Pakistan kübok Tirah tesem...

...province ketdangsürtem agütsüba osang ya shitak masü aser military operation kecha benoka minyaker aser Khyber Pakhtunkhwa province nung amenoka aliba jila nung ya operation benoka inyaktsü kecha tebilemba mali ta shiogo.

Army-i kiralongrartem anema jenjang agütsü ta tetsübu nung iba tesem nung alirtem joko hopta ishika pei talidak ki toktsür oaka Islamabad nung osangbenertem den Khyber Pakhtunkhwa Chief Minister Sohail Afridi-i, military-i jenjang agiba anemogo aser Tirah nung meita aoba sentong benoka minyaktsü mepeshia metetdaksüogo.

Taoba küm December ita mosque ajanga nüburtem dang January 23 nü tashi nungbo Tirah toktsür aotsü osang agütsüba sülen nüburtem jenshia ao tenzük. Northwestern Bajaur district nung Taliban nema Pakistan army-i August ita jenjang agiba sülen iba ya ataloka liasü. August ita-a nisung noklang aika pei talidak ki toktsür jenshia oa liasü.

Provincial sorkar otongdar Shafi Jan-i, pei talidak ki toktsür jenshia or alirtem kanga timtemtepba atema social media ajanga federal ketdangsürtemi dak tai tongloktsüogo aser military operation dak sendakba nung sorkar tamendakdak melenshiba atema Islamabad nung amendaker aliba sorkar aitsüogo.

Kasa mapang nung Khyber Pakhtunkhwa Chief Minister Sohail Afridi-i, military-i jenjang agiba anemogo aser Tirah nung meita aoba sentong benoka minyaktsü mepeshia metetdaksüogo. Military ketdangsürtemi ashiba agi, parnoki maneni Tehrik-e-Taliban Pakistan (TTP) anema intelligence operations benoka inyaktsü. Parnoki ashiba agi, Afghan Taliban-i 2021 sorkar atsüingba sülen TTP sepaitem aika Afghanistan nung jenoka lir aser parnok noklang aika Tirah ajanga senzür aser meita aoba mapang iba jila nung alirtem jong ama amshir.

BILEMDANGANG

"Tangar dang nungi tera tali inyak nungdang na takoker ka akümtsü."